

आकाशवाणी

Evening Dogri (NSD) Bulletin

22-04-2025

खबरां शिवि सूरी कोला

- प्रधानमंत्री नरेंद्र मोदी हुंदा साउदी अरब दे जेद्दा पुज्जने पर 21 तोपें दी सलामी कन्नै सुआगत कीता गेआ।
- जम्मू-कश्मीर दे पहलगाम इलाके च सैलानियें पर आतंकवादियें हमला कीता, प्रधानमंत्री नरेंद्र मोदी होरें गृह मंत्री होरें'गी पहलगाम जाने दे दित्ते निर्देश। गृह मंत्री अमित शाह होरें आखेआ जे आतंकवादी हमला करने आहले अपराधियें खलाफ सख्त कार्रवाई कीती जाग।
- अमरीका दे उपराश्ट्रपति जे.डी वेंस होरें आखेआ जे सदी दा भविक्ख भारत ते अमरीका बश्कार सांझा बपारिक सरबंधें पर निर्भर ऐ।
- 2047 तोड़ी भारत दा विकसित भारत बनने दा सफर महज आकांक्षा नेई, बल्के सांझा राश्ट्रीय मिशन ऐ, आखेआ खजाना मंत्री निर्मला सीतारमण होरें।
- केंद्र सरकार नै मती गर्मी दी हालात थमां श्रमिकें ते मजूरें दी सुरक्षा लेई फौरी गैह पुट्टने दी दित्ती सलाह।
- संघ लोक सेवा आयोग, सिविल सेवा म्तेहान 2024 दे अखीरी नतीजे घोषित।

<><><><><><>

PM Arrival

प्रधानमंत्री नरेंद्र मोदी होर साउदी अरब दी 2 दिनें दी जात्तरा पर जेद्दा पुज्जी गेन। हवाई अड्डे पर उनेंगी 21 तोपें दी सलामी दित्ती गेई। जियां गै प्रधानमंत्री हुंदा ज्हाज साउदी अरब दी वायु सीमा च

पुजेआ, शाही साउदी वायु सेना दे युद्धक विमान उसी अपने कन्नै लेइयै आए। प्रधानमंत्री साउदी अरब दे शहजादे ते प्रधानमंत्री मोहम्मद बिन सलमान हुंदे सादे पर साउदी अरब गेन। एह उंदी साउदी दी अरब दी त्री यात्रा ऐ ते दौनें देशें बश्कार गहरी होआरदी रणनीतिक सांझेदारी गी दर्शादी ऐ। एहदे कोलां पेहले अपने प्रस्थान वक्तव्व च प्रधानमंत्री होरें आखेआ जे भारत साउदी अरब कन्नै अपने दीर्घकालिक ते ऐतिहासिक सरबंधें गी गहराई नै महत्व दिंदा ऐ जिन्ने हाल दे बारें च रणनीतिक गहराई ते गति हासल कीती ऐ। श्री मोदी होरें क्षेत्रीय शांति, समृद्धि ते सुरक्षा गी बढावा देने च दौनें देशें दे सांझा हितें पर जोर भरेआ। अरब न्यूज कन्नै इक साक्षात्कार च श्री मोदी होरें साउदी अरब गी इक विश्वासजोग मित्र ते रणनीतिक सहयोगी दे रूपै च सराहेया ते क्राउन प्रिंस मोहम्मद बिन सलमान हुंदे नेतृत्व ते नजरिये 2030 पळल दी तरीफ कीती। उनें उर्जा, कृषि, हैलें, हरित हाइड्रोजन ते टेकनालजी सने प्रमुख खेत्तरें च सहयोग दे विस्तार पर लौ पाई।

<><><><><><>

Pahalgam-Attack

कश्मीर दी मशहूर सैलानी थाहर पहलगाम च आतंकवादिगं सैलानिगं दे इक समूह पर गोलीबारी कीती। इस गोलीबारी च कई लोक घायल होए न। सुरक्षाबलें आसेआ तपाशी अभियान चलाया गेआ ऐ ते होर जानकारी गी अजें बलगेआ जा'रदा ऐ। उपराज्यपाल मनोज सिन्हा होरें इस कायराना हमले दी सख्त लफजें च निंदेआ कीती ऐ। उनें आखेआ जे हमले लेई जिम्मेदार लोकें गी बखशेया नेई जाग। उनें डीजीपी ते सुरक्षा अधिकारिगं कन्नै गल्ल कीती ते सेहत सरबंधी हमले गी हिदायत कीती जे घायलें गी फौरी मेडिकल सहूलत उपलब्ध करोआई जा। एल.जी होरें घायलें दे तौले नरोए होने दी कामना कीती। मुखमंत्री उमर अब्दुल्ला होरें बी इस घटना दी सख्त लफजें च निंदेआ कीती। प्रधानमंत्री नरेंद्र मोदी होरें इस घटना बारै गृह मंत्री अमित शाह हुंदे कन्नै फोन पर गल्ल कीती ते उनेंगी घटना आहली थाहर दा दौरा लाने लेई आखेआ। प्रधानमंत्री होरें लोडचदी कार्रवाई करने दे निर्देश दित्ते। गृह मंत्री होरें इस हमले दी निंदेआ कीती। गृह मंत्री अमित शाह होरें आखेआ जे ओह तौले गै श्रीनगर लेई रवाना होडन ते सुरक्षा एजेंसिगं कन्नै जायजा बैठक लाडन।



Mumbai-Kiran

केंद्री अल्पसंख्यक मामलें दे मंत्री किरेंण रिजिजू होरें आखेआ जे वक्फ संशोधन अधिनियम दा मकसद गरीब मुसलमानें गी लाहू पुजाना ते संपत्ति दा दुरुपयोग रोकना ऐ। वक्फ सुधार ते जन जागरूकता अभियान तैहत मुम्बई च अज्ज आयोजित इक संवाददाता सम्मेलन च श्री रिजिजू होरें आखेआ जे भारत जनेए बड्डे देश च जमीन दे इक-इक इंच दा सेई इस्तेमाल होना लोडचदा ऐ। रिजिजू होरें आखेआ जे हुन थमां वक्फ बोर्ड मनमाने ढंग्गै नै कुसा बी ग्रांs गी वक्फ समर्पित घोषित नेई करी सकोग।



VS Vice Prez.

अमरीका दे उपराश्ट्रपति जेडी वेंस होरें आखेआ जे कि सदी दा भविक्ख भारत ते अमरीका बश्कार सांझा बवारिक सरबंधें पर निर्भर करदा ऐ। उनें आखेआ जे दौनें देशें आधिकारिक तौरा पर बपार वार्ता दी शर्ते गी अखीरी रूप देई दित्ता ऐ। जयपुर च इक बिजनेस समिट च श्री वेंस होरें आखेआ जे अमरीका दे राश्ट्रपति डोनाल्ड ट्रम्प हुंदी टेरिफ नीति दी आलोचना होआरदी ऐ, मगरा उनें संतुलित बपार दा माहौल बनाया ऐ। उपराश्ट्रपति होरें आखेआ जे रक्षा दे खेत्तर च भारत-अमरीका दा सब्बनें शा करीबी ते विश्वासजोग सांझेदार ऐ। श्री वेंस होरें भारत च नमें मकान बनाने ते सुविधां विकसित करने च सांझेदारी पर बी बल दित्ता।



FM-Viksit Bharat

केंद्री खजाना मंत्री निर्मला सीतारमण होरें आखेआ जे 2047 तोडी भारत दा विकसित भारत बनने दा सफर महज इक्क आकांक्षा नेई बल्के इक सांझा राश्ट्रीय मिशन ऐ। उनें आखेआ जे विकसित भारत

मिशन समावेशी, टिकाऊ ते नमियां काडुं कडुने उप्पर आधारित विकास दे नजरिये थमां प्रेरित ऐ। अमरीका च स्टैनफोर्ड यूनिवर्सिटी च अज्ज अपने संबोधन दौरान खजाना मंत्री होरें आखेआ जे भारत दुनिया दी 10मीं थमां 5मीं सब्बनें शा बड्डी अर्थ बवस्था बनी गेआ ऐ। उनें आखेआ जे एहू भारत दी बददी ताकत ते वैश्विक प्रासंगिकता दा संकेत ऐ। सुश्री सीतारमण होरें आखेआ जे भारत च कीते गेदे किश कम्म काबले जिक्र न ते एहदी मिसाल डिजिटल पब्लिक इंफ्रास्ट्रक्चर ते एहदी सफलता ऐ। उनें आखेआ जे प्रधानमंत्री नरेंद्र मोदी हुंदी गुजारश पर कम्मकाजी महिलाएं लेई मातृत्व सरबंधी छुट्टी गी बदाइयै 6 म्हीने करी दित्ता गेआ ऐ।

<><><><><><>

Kailash Mansrovar Yatra

कैलाश मानसरोवर यात्रा कोविड दे 4 बरे बाद 30 जून गी फी शुरू होने जा रदी ऐ। एहू तीर्थ यात्रा उत्तराखंड रस्ते हुंदेआ जाग। एहू जात्तरा उत्तराखंड सरकार ते विदेश मंत्रालय दे संयुक्त निरीक्षण च आयोजित कीती जाग। कुमाऊ मंडल विकास निगम गी इस तीर्थ यात्रा दे प्रबंधन दी जुम्मेदारी दित्ती गेई ऐ। एहू जात्तरा दिल्ली थमां शुरू होइयै चीन च प्रवेश करने लेई पिथौरागढ़ दे लिपुलेख पास थमां होइयै अग्गे बदोग। 22 दिनें दी इस आध्यात्मिक यात्रा पर कुल 250 तीर्थ यात्री जांगन। इनें यात्रियें गी 50-50 दे 5 जत्थे च बण्डेआ जाग। पैहला जत्था चीन च 10 जुलाई गी प्रवेश करोग ते अखीरी जत्था 22 अगस्त गी वापस परतोग।

<><><><><><>

VP-Constitution

उपराश्ट्रपति जगदीप धनखड़ होरें आखेआ जे चुनोए दे प्रतिनिधि संविधान दी विषय-वस्तु तय करने च सर्वोच्च हुंदे न। दिल्ली यूनिवर्सिटी च इक कार्यक्रम दौरान उपराश्ट्रपति होरें जोर दित्ता जे संसद सर्वोच्च ऐ। उनें एहू बी आखेआ जे संविधान च संसद उप्पर कुसा बी प्राधिकरणें दी कल्पना नेई कीती गेई ऐ। उपराश्ट्रपति होरें अग्गे आखेआ जे नागरिकें संविधान तैहत अपने प्रतिनिधियें गी चुनेआ ऐ तां

जे ओहू अपनी अभिव्यक्ति, इच्छा ते इच्छाएं दा प्रतिनिधित्व करन ते चुनांऽ दौरान एहू प्रतिनिधि जवाबदेह हुंदे न।

<><><><><><>

Centre Heat Wave

केंद्र सरकार नै मती ज्यादा गर्मी आहले हालात थमां कम्मगारें ते मजूरें गी सुरक्षित रखने गितै राज्यें ते केंद्र शासित प्रदेशें गी इक एडवाजरी जारी कीती ऐ। नमीं दिल्ली च संवाददाताएं कन्नै गल्ल करदे होई श्रम ते रोजगार मंत्री मनसुख मांडविया होरें आखेआ जे मंत्रालय राज्यें ते केंद्र शासित प्रदेशें दे सब्बै सचिवें ते प्रशासनिकें गी इस ताई इक चिट्ठी लिखी ऐ। उनें आखेआ जे राज्यें ते केंद्र शासित प्रदेशें गी कर्मचारिणं, उद्योगें ते निर्माण आहली कंपनिणं दे मजूरें गी इस भीषण गर्मी थमां बचाने ते इस ताई निब्वडने लेई असरदार तरीका अपनाने दे बारे एडवाइजरी जारी कीती ऐ। डॉ. मांडविया होरें आखेआ जे अपनी एडवाइजरी च मंत्रालय नै मती गर्मी दे समें थमां बचने लेई कम्म दे घटें गी तय करने, पर्याप्त मात्रा च पीने आहले पानी दी उपलब्धता यकीनी करने ते नियमित स्वास्थ्य जांच करने दी सिफारिश कीती ऐ। डॉ. मांडविया होरें आखेआ जे ई.एस.आई तैहत अस्पतालें ते औषधालयें गी हीट स्ट्रोक दे मामलें लेई समर्पित डेस्क स्थापित करने ते गर्मी कन्नै सरबंधित बमारियें नै निब्वडने लेई ओ.आर.एस, आईस पैक ते होरनें जरूरी सामग्री दी उपलब्धता यकीनी करने दा निर्देश दित्ता ऐ।

<><><><><><>

UPSC-Results

संघ लोक सेवा आयोग, सिविल सेवा परीक्षा 2024 दे अखीरी नतीजे घोषित करी दित्ते गेन। आयोग नै नियुक्ति लेई कुल 1 जहार 9 मेदवारें दी सिफारिश कीती ऐ जिंदे च 725 पुरूष ते 284 महिलां न। शक्ति दुबे होरें सिविल सेवा म्तेहान, 2024 च पैहली थाहर हासल कीती ऐ। संघ लोक सेवा आयोग

आसेआ सिविल सेवा म्तेहान दा लिखित म्तेहान पिछले बरे सितंबर च आयोजित कीती गई ही जेदे बाद इस बरे जनवरी थमां अप्रैल बश्कार साक्षात्कार होआ हा।

<><><><><><>

Pope-Funeral

वेटिकन च अज्ज कार्डिनल्स दी बैठक दे बाद पोप फ्रांसिस हुंदे अखीरी संस्कार दी योजना दी घोषणा करी दिती ऐ। पोप फ्रांसिस हुंदा अखीरी संस्कार सेंट पिटर्स स्क्वायर च शनिवार गी कीता जाग। उन्दे संस्कार च दुनिया भर दे राश्ट्राध्यक्षें ते राश्ट्र प्रमुख दे पुज्जने दी मेद ऐ। अमरीका दे राश्ट्रपति डोनाल्ड ट्रम्प होरें उन्दे अखीरी संस्कार च शामिल होने दी सब्बनें शा पहले घोषणा कीती ही।

<><><><><><>

Highway-Update

मुगल शिडक पर दौनें भेठा दा गड्डिएं दी आवाजाई जारी ऐ। श्रीनगर-सोनामर्ग-गुमरी शिडक पर कारगिल ते श्रीनगर आहली भेठा आवा जाई जारी ऐ। सिंथन शिडक पर यातायात राश्ट्रीय जरनैली शिडका ते ढांचागत विकास सरबंधी कार्पोरेशन लिमिटेड आसेआ हरी झंडी थ्होने मगरा गै बहाल कीता जाग। यात्रिएं गी सलाह दिती गई ऐ जे ओहू अपनी-अपनी लेन च चलन, नियमें दी पालमा करन, ओवरटेकिंग ते गलत लेन च चलने थवां बचन। ताई, जम्मू-श्रीनगर राश्ट्रीय जरनैली शिडक अजें बी बंद ऐ ते शिडका पर यातायात बहाल करने दा कम्म जारी ऐ।

<><><><><><>

Ramban-Rescue

रामबन च राहत ते बचाऽ कम्म बरोबर जारी ऐ। इलाके च 1 ज्हार 486 ट्रांसफार्मरें गी परतिए बहाल करी दिता गेआ ऐ। केंद्री राज्य मंत्री डॉ. जितेंद्र सिंह होरें जानकारी दिती जे 1 ज्हार 486

ट्रांसफार्मिंग राणं बिजली सप्लाई कीती जा रदी ऐ ते बाकी रौहंदे 286 दा कम्म जारी ऐ। उनें आखेआ जे राश्ट्रीय जरनैली शिडक गी आंशिक तौर पर कल्लै तगर बहाल करी दित्ता जाग। पानी सप्लाई बारै उनें आखेआ जे 98 चा 89 चालू न। मंत्री होरें प्रशासन दे जत्तें दी सराहना कीती।

<><><><><><>